



# UNDANG-UNDANG MALAYSIA

---

VERSI ATAS TALIAN TEKS CETAKAN SEMULA  
YANG KEMAS KINI

---

**Akta 279**

## AKTA PERBADANAN PEMBEKALAN LETRIK SARAWAK 1983

*Sebagaimana pada 1 September 2012*

**AKTA PERBADANAN PEMBEKALAN LETRIK  
SARAWAK 1983**

Tarikh Perkenan Diraja ... .. 9 Mac 1983

Tarikh penyiaran dalam *Warta* ... .. 10 Mac 1983

Kali terakhir dipinda melalui

Akta 478 yang mula

berkuat kuasa pada ... .. 21 Februari 1992

# UNDANG-UNDANG MALAYSIA

## Akta 279

### AKTA PERBADANAN PEMBEKALAN LETRIK SARAWAK 1983

---

#### SUSUNAN SEKSYEN

---

#### BAHAGIAN I

#### PERMULAAN

Seksyen

1. Tajuk ringkas dan permulaan kuat kuasa
2. Tafsiran

#### BAHAGIAN II

#### PENUBUHAN, PEMERBADANAN DAN KEANGGOTAAN PERBADANAN, DLL.

##### *Penubuhan dan Pemerbadanan*

3. Penubuhan dan pemerbadanan Perbadanan Pembekalan Letrik Sarawak
4. Meterai perbadanan

##### *Keanggotaan Perbadanan*

5. Keanggotaan Perbadanan
6. Anggota Perbadanan hendaklah melupuskan kepentingan dalam mana-mana pengusahaan elektrik di Sarawak
7. Penzahiran kepentingan dalam kontrak oleh anggota Perbadanan
8. Saraan dan elaun yang kena dibayar kepada anggota Perbadanan

*Tatacara*

## Seksyen

9. Kuorum dan tatacara
10. Kekosongan
11. Tatacara Perbadanan

*Pegawai dan Pekhidmat Perbadanan, dll.*

12. Pelantikan pegawai dan pekhidmat
13. Pekhidmat awam
14. Akta Perlindungan Pihak Berkuasa Awam 1948 terpakai
15. Kuasa memasuki permis, dll.

## BAHAGIAN III

## FUNGSI DAN TUGAS PERBADANAN, DLL.

*Fungsi dan Tugas*

16. Fungsi am Perbadanan

*Bekalan*

17. Tugas Perbadanan untuk membekalkan tenaga
18. Kuasa Perbadanan membekalkan gas dan hidroelektrik
19. Layanan sama rata
20. Bekalan bagi maksud persendirian dan kepada lampu awam
21. Syarat di bawah mana bekalan boleh diberhentikan
22. Pemberhentian sementara bekalan tenaga

BAHAGIAN IV

Seksyen

23. Kuasa mengeluarkan stok, dll.
24. Kuasa meminjam wang
25. Tugas dan kuasa am Perbadanan dalam perkara kewangan
26. Kadar dan skala caj bagi tenaga
27. Kuasa untuk membuat perintah tetap berhubungan dengan kakitangan
28. Penggunaan hasil
29. Pelaburan wang
30. Akta Badan Berkanun (Akaun dan Laporan Tahunan) 1980 terpakai
31. (*Dipotong*)

PERUNTUKAN KEWANGAN

*Kuasa Meminjam dan Menambahkan Modal*

BAHAGIAN V

KUASA MEMASUKI TANAH, DLL.

*Kuasa Memasuki Tanah*

32. Kuasa memasuki tanah untuk tujuan pembinaan
33. Penyelenggaraan dan pembaikan pemasangan
34. Mengalih atau mengubah talian bekalan, dll.
35. Rayuan kepada Menteri
36. Kuasa untuk memasang tiang lampu, dll.

*Kerja-kerja*

37. Kuasa untuk memecahkan lebu, dll. di bawah pengawasan, dan untuk membuka parit
38. Syarat tentang pengawasan pemecahan lebu
39. Lebu, dll., yang dipecahkan hendaklah dibaiki semula tanpa kelengahan
40. Notis hendaklah disampaikan kepada orang yang mempunyai kawalan, dll., sebelum memecahkan lebu atau membuka parit
41. Pampasan

BAHAGIAN VI  
KESALAHAN-KESALAHAN

Seksyen

- 42. Kesalahan-kesalahan
- 43. Beban pembuktian
- 44. Kesalahan-kesalahan yang dilakukan oleh pertubuhan perbadanan
- 45. Mendapatkan balik penalti, dsb.

BAHAGIAN VII  
PEMINDAHAN PENGUSAHAAN, DSB.,  
PERTUBUHAN PERBADANAN KEPADA  
PERBADANAN

*Harta, Kontrak, dsb,*

- 46. Pampasan bagi pengusahaan yang dipindahkan
- 47. Kontrak, dsb., yang sedia ada
- 48. Prosiding belum selesai

*Pegawai atau Pekhidmat*

- 49. Pertukaran pegawai atau pekhidmat dalam perjawatan pertubuhan perbadanan

BAHAGIAN VIII

AM

- 50. Kuasa Menteri untuk mewakilkan kuasa
- 51. Kuasa Menteri memberi arahan
- 52. Peraturan-peraturan
- 53. Kuasa untuk membuat kontrak gerenti atau tanggung rugi
- 54. Hak kekecualian Kerajaan Sarawak di pantai pasang surut

“bahaya” artinya bahaya kepada kesihatan atau kepada nyawa manusia atau anggota badan daripada renjatan, lecuran, atau bencana lain akibat daripada penjanaaan, pengubahan bentuk, pengagihan atau penggunaan tenaga dan meliputi bahaya kepada harta disebabkan

kebakaran akibat daripada hal sebagaimana yang disebut terdahulu;

“kawasan bekalan” ertinya kawasan yang dalamnya Perbadanan atau pemegang lesen dibenarkan untuk menjana dan/atau untuk membekalkan tenaga;

“kelengkapan” meliputi apa-apa butiran seperti mesin, transformer, radas, instrumen penyukat, alat pelindung, bahan pendawaian, aksesori dan perkakas bagi maksud penjanaan, penukaran, penghantaran, pengagihan atau penggunaan tenaga elektrik;

“keselamatan awam” ertinya pengelakan daripada tertimpa bahaya kepada orang awam, harta awam dan jalan, lebu, landasan keretapi, lapangan terbang, pelabuhan, terusan, limbungan, dermaga, pangkalan, jambatan, loji gas, kerja air dan apurtenannya serta talian telegraf, telefon dan talian semboyan elektrik lain yang dipunyai atau dikendalikan oleh Kerajaan Malaysia atau mana-mana Kerajaan Negeri;

“keselamatan diri” ertinya pengelakan daripada tertimpa bahaya kepada individu atau kepada harta persendirian;

“lebu” meliputi sesuatu jalan, lorong, jalan kecil, laluan atau tanah lapang, sama ada jalan tembus atau tidak, yang orang awam mempunyai hak lalu lalang;

“lesen” ertinya suatu lesen untuk mengendali atau mengerjakan sesuatu pepasangan yang dikeluarkan di bawah mana-mana undang-undang bertulis berhubungan dengan elektrik dan meliputi apa-apa lesen yang dikeluarkan di bawah mana-mana undang-undang lain yang berkuat kuasa sebelum pengisytiharan Akta ini;

“Menteri” ertinya Menteri yang pada masa itu bertanggungjawab bagi perkara yang berhubungan dengan tenaga;

“Negeri” ertinya Negeri Sarawak;

“pemegang lesen” ertinya pemegang suatu lesen;



“Pengerusi” ertinya Pengerusi Perbadanan yang dilantik di bawah seksyen 5;

“penggerak utama” ertinya mesin yang membekalkan tenaga sawat ke penjana;

“pengguna” ertinya seseorang yang dibekalkan tenaga atau yang premisnya ada pada masa itu disambungkan dengan apa-apa sistem bekalan bagi maksud bekalan tenaga;

“pengubahan bentuk” ertinya pengubahan bentuk voltan dari voltan yang rendah kepada yang tinggi atau sebaliknya;

“Pengurus Besar” ertinya Pengurus Besar yang dilantik di bawah seksyen 12 dan meliputi mana-mana orang yang pada masa itu dilantik sedemikian untuk melaksanakan tugas Pengurus Besar;

“pemasangan” ertinya keseluruhan mana-mana loji atau kelengkapan yang bertujuan untuk membekal atau menggunakan tenaga, atau kedua-duanya, mengikut mana yang berkenaan, dan meliputi penggerak utama, jika ada, berserta semua talian bekalan dan kelengkapan pengguna, jika ada;

“Perbadanan” ertinya Perbadanan yang ditubuhkan oleh seksyen 3;

“premis” meliputi mana-mana bangunan atau binaan lain dan tanah yang diduduki atau digunakan berkaitan dengannya, yang berada di bawah satu pemilikan, pendudukan atau pengurusan;

“sistem” ertinya suatu sistem elektrik dalam mana semua konduktor dan kelengkapan adalah disambungkan secara elektrik atau magnet;

“stesen janakuasa” ertinya mana-mana stesen untuk menjanakan tenaga meliputi apa-apa bangunan dan loji yang digunakan bagi maksud itu serta tapak binanya, dan meliputi tapak bina yang dicadang hendak digunakan bagi mendirikan stesen janakuasa, tetapi tidak meliputi mana-mana stesen untuk mengubah bentuk, menukar atau mengagihkan tenaga;

“talian bekalan” ertinya konduktor atau alat-alat lain untuk menyampaikan, menghantar atau mengagihkan tenaga, berserta dengan apa-apa kelongsong, salutan, penutup, tiub, paip, penebat atau tiang yang menyarungi, mengelilingi atau menumpanginya atau mana-mana bahagiannya, atau apa-apa bangunan atau kelengkapan yang berkaitan dengannya bagi maksud mengubah bentuk, menyampai, menghantar atau mengagihkan tenaga;

“tenaga” ertinya tenaga elektrik yang dijana, dihantar, dibekalkan atau digunakan bagi apa-apa maksud kecuali bagi maksud penghantaran sesuatu bentuk perhubungan atau isyarat; elektrik melainkan jika ditakrifkan selainnya, adalah suatu benda sebagai mana diperuntukkan di bawah seksyen 3 Akta Kilang dan Jentera 1967 [*Akta 139*];

“voltan” ertinya voltan lebih tinggi, voltan tinggi, voltan rendah dan voltan lebih rendah sebagaimana yang ditetapkan.

## BAHAGIAN II

### PENUBUHAN, PEMERBADANAN DAN KEANGGOTAAN PERBADANAN, DLL

#### *Penubuhan dan Pemerbadanan*

#### **Penubuhan dan pemerbadanan Perbadanan Pembekalan Letrik Sarawak**

3. Maka dengan ini ditubuhkan suatu perbadanan yang dikenali sebagai “Perbadanan Pembekalan Letrik Sarawak” atau dalam bahasa Inggerisnya “Sarawak Electricity Supply Corporation”, hendaklah menjadi suatu pertubuhan perbadanan dan boleh membawa guaman dan dibawa guaman terhadapnya atas namanya yang tersebut, dan hendaklah kekal turun-temurun, dan boleh membuat kontrak, dan boleh memperoleh, membeli, mengambil, memegang dan menikmati apa-apa jenis harta alih dan harta tak alih, dan boleh memindahkan, menyerahkan, menyerahkan balik dan memulangkan,

menggadaikan, menggadaikan, mendemiskan, menyerahkan, semula, memindahkan hakmilik atau dengan selainnya melupuskan atau membuat apa-apa urusan mengenai, apa-apa harta alih atau harta tak alih yang terletak hak pada Perbadanan mengikut apa-apa terma yang disifatkannya patut oleh Perbadanan.

### **Meterai perbadanan**

4. (1) Perbadanan hendaklah mempunyai suatu meterai perbadanan, dan meterai itu boleh dari semasa ke semasa dipecah, ditukar, diubah dan dibuat baharu sebagaimana yang disifatkan patut oleh Perbadanan, dan sehingga suatu meterai diadakan di bawah seksyen ini, suatu cap mengandungi perkataan “Perbadanan Pembekalan Letrik Sarawak” bolehlah digunakan sebagai meterai perbadanan.

(2) Semua surat ikatan, dokumen dan surat cara lain yang memerlukan meterai Perbadanan hendaklah dimeterai dengan meterai Perbadanan di hadapan Pengerusi atau Timbalan Pengerusi, dan Setiausaha Perbadanan atau orang yang lain yang diberi kuasa oleh Perbadanan untuk bertindak bagi pihaknya, yang hendaklah menandatangani tiap-tiap surat ikatan, dokumen dan surat cara lain yang meterai itu perlu dicapkan, dan tandatangan itu adalah menjadi keterangan yang cukup bahawa meterai itu telah dicapkan dengan sewajar dan sempurna dan bahawa meterai itu adalah meterai Perbadanan yang sah:

Dengan syarat bahawa sesuatu dokumen atau surat cara yang jika disempurnakan oleh seseorang yang bukan pertubuhan perbadanan tidak akan dikehendaki menggunakan meterai boleh dengan cara yang sama disempurnakan oleh Perbadanan, dan dokumen atau surat cara itu boleh disempurnakan bagi pihak Perbadanan oleh mana-mana pegawai atau pekhidmatnya yang diberi kuasa secara am atau khas secara bertulis untuk bertindak sedemikian.

*Keanggotaan Perbadanan***Keanggotaan Perbadanan**

5. (1) Perbadanan hendaklah terdiri daripada—

- (a) seorang Pengerusi;
- (b) seorang Timbalan Penegrusi;
- (c) Pengurus Besar yang tidak berhak mengundi di mesyuarat Perbadanan; dan
- (d) tidak lebih daripada tujuh anggota lain,

yang hendaklah dilantik oleh Menteri:

Dengan syarat bahawa bilangan pegawai tidak boleh melebihi bilangan anggota bukan pegawai.

(2) Tertakluk kepada peruntukan Akta ini, anggota Perbadanan hendaklah memegang jawatan bagi suatu tempoh dan tertakluk kepada apa-apa syarat yang ditetapkan oleh Menteri.

(3) Jika mana-mana anggota Perbadanan tidak ada buat sementara di Sarawak atau kerana apa-apa sebab lain, tidak berupaya buat sementara untuk bertindak, Menteri boleh melantik mana-mana orang untuk bertindak mengambil tempat anggota itu buat sementara:

Dengan syarat bahawa tiada seorang pun boleh dilantik untuk bertindak mengambil tempat Pengerusi atau Timbalan Pengerusi buat sementara kecuali dia adalah seorang anggota Perbadanan.

(4) Jika pada bila-bila masa Menteri mendapati bahawa pemecatan kesemua atau mana-mana anggota Perbadanan adalah perlu bagi kepentingan melaksanakan dengan efektif dan ekonomis fungsi Perbadanan di bawah Akta ini, Menteri boleh memecat, tanpa memberi apa-apa sebab, kesemua atau mana-mana anggota Perbadanan.

(5) Menteri boleh, pada bila-bila masa, menerima peletakan

jawatan mana-mana anggota Perbadanan.

(6) Pengerusi boleh, melalui surat cara bertulis, memberi kuasa kepada mana-mana orang untuk menjalankan mana-mana kuasa atau melaksanakan apa-apa fungsi, selain fungsi yang disebut dalam subseksyen 4(2), yang diberi kepada Pengerusi oleh atau di bawah Akta ini.

**Anggota Perbadanan hendaklah melupuskan kepentingan dalam mana-mana perusahaan elektrik di Sarawak**

6. (1) Tiap-tiap orang yang dilantik menjadi anggota Perbadanan hendaklah, dalam tempoh tiga bulan selepas pelantikannya, menjual atau melupuskan semua syer dalam mana-mana perusahaan elektrik yang, pada masa pelantikannya, dimilikinya atau dia berkepentingan, secara langsung atau secara tidak langsung, bagi faedahnya sendiri dan faedah keluarga terdekatnya, dan adalah menyalahi undang-undang bagi mana-mana anggota Perbadanan, selagi dia masih memegang jawatan sedemikian, membeli atau menjadi berkepentingan dalam apa-apa syer, secara langsung atau secara tidak langsung, bagi faedahnya sendiri atau faedah keluarga terdekatnya, dalam mana-mana perusahaan elektrik, dan, jika mana-mana anggota Perbadanan berhak sedemikian, bagi faedahnya sendiri, di bawah sesuatu wasiat atau pewarisan, kepada apa-apa syer dalam mana-mana perusahaan elektrik, dia hendaklah menjual atau melupuskannya dalam tempoh tiga bulan selepas dia berhak ke atasnya:

Dengan syarat bahawa Menteri boleh melepaskan kehendak subseksyen ini dalam sesuatu hal tertentu.

(2) Mana-mana anggota Perbadanan yang menyimpan, membeli, mengambil atau menjadi berkepentingan atau terus menjadi berkepentingan secara langsung atau secara tidak langsung dalam apa-apa syer dalam mana-mana perusahaan elektrik melanggar dengan peruntukan seksyen ini adalah hilang kelayakan menjadi anggota, dan disifatkan telah mengosongkan jawatannya sebagai anggota itu, dan Pengerusi hendaklah menyebabkan suatu catatan yang bermaksud

sedemikian dibuat dalam minit Perbadanan dengan seberapa segera yang praktik setelah fakta mengenai apa-apa pelanggaran itu sampai kepada pengetahuannya.

(3) Hakikat bahawa seseorang yang hilang kelayakan di bawah seksyen ini telahpun menganggotai, atau mengambil bahagian dalam apa-apa prosiding, Perbadanan sebelum apa-apa cacatan sebagaimana yang disebut terdahulu dibuat dalam minit itu tidak boleh menidaksahkan apa-apa ketetapan atau prosiding Perbadanan.

(4) Dalam seksyen ini—

“syer dalam mana-mana pengusahaan elektrik” ertinya apa-apa stok, syer, debentur, stok debentur, bon atau sekuriti lain mana-mana syarikat yang menjalankan perniagaan di Sarawak dalam menjanakan, mengagihkan atau membekalkan tenaga, atau mengilang dalam Negeri itu kelengkapan elektrik, dan termasuk apa-apa syer atau kepentingan dalam mana-mana pengusahaan tidak diperbadankan yang menjalankan perniagaan yang sama.

### **Penzahiran kepentingan dalam kontrak oleh anggota Perbadanan**

7. Seorang anggota Perbadanan, jika dia mempunyai apa-apa kepentingan dalam mana-mana syarikat atau pengusahaan yang dengannya Perbadanan bercadang hendak membuat apa-apa kontrak, atau mempunyai apa-apa kepentingan dalam mana-mana kontrak itu, hendaklah menzahirkan kepada Perbadanan hakikat mengenai kepentingan itu dan jenisnya itu, dan penzahiran itu hendaklah direkodkan dalam minit Perbadanan, dan, melainkan dibenarkan dengan khas oleh Pengerusi, anggota itu tidak boleh mengambil apa-apa bahagian dalam apa-apa pertimbangan atau keputusan Perbadanan berhubungan dengan kontrak itu.

### **Saraan dan elaun yang kena dibayar kepada anggota Perbadanan**

8. Anggota Perbadanan hendaklah menerima apa-apa saraan dan elaun daripada kumpulan wang Perbadanan sebagaimana yang

ditetapkan melalui peraturan-peraturan yang dibuat di bawah seksyen 52.

*Tatacara*

**Kuorum dan tatacara**

**9.** (1) Kuorum pada semua mesyuarat Perbadanan adalah tiga orang anggota selain Pengerusi atau Timbalan Pengerusi.

(2) Pengerusi, atau, dalam masa ketidakhadirannya, Timbalan Pengerusi, hendaklah mempengerusikan semua mesyuarat Perbadanan.

(3) Jika bilangan undi mengenai apa-apa persoalan adalah sama banyak Pengerusi atau Timbalan Pengerusi, mengikut mana yang berkenaan, hendaklah mempunyai undi pemutus selain undi biasanya.

**Kekosongan**

**10.** Perbadanan boleh bertindak walaupun terdapat apa-apa kekosongan dalam keanggotaannya.

**Tatacara Perbadanan**

**11.** Tertakluk kepada peruntukan Akta ini, Perbadanan boleh membuat perintah tetap mengawal selia tatacaranya sendiri secara am, dan, khususnya, berkenaan dengan mengadakan mesyuarat, notis yang hendak diberi mengenai mesyuarat itu, prosiding dalam mesyuarat itu, penyimpanan minit, penjagaan, pengemukaan dan pemeriksaan minit itu, dan pembukaan, penyimpanan, penutupan dan pengauditan akaun.

*Pegawai dan Pekhidmat Perbadanan, dll.***Pelantikan pegawai dan pekhidmat****12.** (1) Perbadanan boleh—

- (a) dengan persetujuan Menteri, dari semasa ke semasa, melantik dan mengambil kerja seorang Pengurus Besar dan beberapa orang Timbalan Pengurus Besar; dan
- (b) dari semasa ke semasa, melantik dan mengambil kerja, seorang Setiausaha dan beberapa orang pegawai dan pekhidmat lain sebagaimana yang perlu;

bagi maksud Akta ini.

(2) Semua pegawai dan pekhidmat Perbadanan hendaklah berada di bawah kawalan pentadbiran Pengerusi.

**Pekhidmat awam**

**13.** Semua anggota, pegawai dan pekhidmat Perbadanan hendaklah disifatkan sebagai pekhidmat awam dalam erti Kanun Keseksaan [Akta 574].

**Akta Perlindungan Pihak Berkuasa Awam 1948 terpakai**

**14.** Akta Perlindungan Pihak Berkuasa Awam 1948 [Akta 198] hendaklah terpakai bagi apa-apa tindakan, guaman, pendakwaan atau prosiding yang dibawa terhadap Perbadanan atau terhadap mana-mana anggota, pegawai, pekhidmat atau ejen Perbadanan berkenaan dengan apa-apa perbuatan, kecuaiian atau kemungkiran yang dilakukan oleh mana-mana anggota, pegawai, pekhidmat atau ejen Perbadanan.



**Kuasa memasuki premis, dll.**

**15.** (1) Mana-mana pegawai atau pekhidmat Perbadanan yang pada am atau khasnya diberi kuasa secara bertulis oleh Perbadanan bagi maksud itu hendaklah, semasa mengemukakan, jika dikehendaki sedemikian, suatu dokumen menunjukkan kuasanya, mempunyai hak untuk memasuki mana-mana tanah, premis atau bangunan pada setiap waktu yang munasabah bagi maksud menentukan sama ada terdapat atau telah berlaku apa-apa pelanggaran terhadap terma dan syarat kontrak yang dibuat di antara pengguna dan Perbadanan menurut subseksyen 17(1).

(2) Mana-mana orang yang enggan membenarkan atau menghalang mana-mana pegawai atau pekhidmat yang diberi kuasa oleh Perbadanan daripada memasuki tanah, premis atau bangunan, atau menghalang atau mengganggu pegawai atau pekhidmat itu daripada bertindak di bawah seksyen ini melakukan suatu kesalahan dan boleh, apabila disabitkan, dipenjarakan selama tempoh tiga bulan dan didenda lima ratus ringgit.

**BAHAGIAN III**

**FUNGSI DAN TUGAS PERBADANAN, DSB.**

*Fungsi dan Tugas*

**Fungsi am Perbadanan**

**16.** (1) Tertakluk sebagaimana yang diperuntukkan kemudian daripada ini, adalah menjadi tugas Lembaga—

(a) untuk mengurus dan mengerjakan pemasangan elektrik kepunyaan Perbadanan, dan apa-apa pemasangan dan kelengkapan lain yang diperoleh oleh Perbadanan di bawah peruntukan Akta ini;

(b) untuk menubuhkan, menguruskan dan mengerjakan apa-apa

pepasangan elektrik yang disifatkan penting oleh Perbadanan supaya ditubuhkan;

- (c) untuk memajukan dan menggalakkan penjanaan tenaga dengan tujuan untuk membangunkan ekonomi Sarawak khususnya dan Malaysia amnya;
- (d) untuk mendapatkan bekalan tenaga dengan harga yang munasabah; dan
- (e) untuk menasihat Menteri dalam semua perkara berhubungan dengan penjanaan, penghantaran, pengagihan dan penggunaan tenaga.

(2) Bagi maksud subseksyen (1), Perbadanan boleh—

- (a) tertakluk kepada peruntukan Akta ini menjana, menghantar, mengubah bentuk, mengagihkan dan menjual tenaga sama ada secara pukal atau kepada pengguna individu di mana-mana bahagian Sarawak atau Malaysia;
- (b) membeli, membina, membina semula, menyenggara dan mengendalikan talian bekalan, stesen jana kuasa, stesen transformer, dan semua stesen, bangunan dan kerja lain yang sesuai, meliputi, tertakluk kepada pematuhan peruntukan mana-mana undang-undang bertulis berhubungan dengan pengeluaran lesen air yang sedang berkuat kuasa, pengambilan air dari mana-mana tasik, sungai, anak sungai atau sumber alam lain, dan melakukan segala perbuatan yang perlu bagi maksud mengguna dan mengembalikan atau selainnya melupuskan air yang diambil sedemikian itu;
- (c) menjual, menyewa atau selainnya membekalkan loji elektrik dan pasangan elektrik dan memasang, membaiki, menyenggara atau memindahkan apa-apa loji elektrik dan pasangan elektrik;
- (d) memperolehi, mengikut peruntukan Akta ini, apa-apa harta alih atau harta tak alih, yang disifatkan oleh Perbadanan

perlu atau suai manfaat bagi maksud membina, menyambung atau rnenyenggara mana-mana pepasangan atau selainnya bagi menjalankan tugas dan fungsinya di bawah Akta ini; dan

- (e) menjalankan segala kegiatan lain yang pada pendapat Perbadanan perlu, berfaedah atau mudah baginya menjalankan tugasnya, bagi atau berkaitan dengan pelaksanaan tugasnya di bawah Akta ini atau dengan tujuan hendak mempergunakan dengan sebaik-baiknya mana-mana asetnya.

### *Bekalan*

#### **Tugas Perbadanan untuk membekalkan tenaga**

**17.** (1) Tertakluk kepada peruntukan subseksyen (2), setakat yang ia boleh berbuat demikian dalam kawasan bekalan Perbadanan sebagaimana ditentukan dari semasa ke semasa oleh Menteri, Perbadanan hendaklah membekalkan tenaga kepada mana-mana orang, selain pemegang lesen, yang menghendaki bekalan tenaga (dalam seksyen ini disebut pengguna) jika pengguna itu mengaku janji membuat kontrak dengan Perbadanan, dengan memberi apa-apa sekuriti sebagaimana dikehendaki oleh Perbadanan untuk diambil, atau terus diterima, dan untuk membayar bagi bekalan tenaga mengikut apa-apa terma dan syarat sebagaimana yang ditentukan oleh Perbadanan.

(2) Perbadanan tidak boleh membekalkan tenaga kepada pengguna, selain pemegang lesen, di sesuatu kawasan yang pada masa itu menjadi sebahagian daripada kawasan bekalan pemegang lesen, kecuali dengan izin pemegang lesen itu:

Dengan syarat bahawa jika izin pemegang lesen dikehendaki di bawah subseksyen ini dan pemegang lesen itu tidak memberi atau menahan izin itu, Perbadanan boleh merayu kepada Menteri, dan Menteri, jika berpuas hati bahawa izin pemegang lesen itu tidak

diberi atau ditahan dengan tidak munasabahnyanya, boleh tidak memerlukan izin itu.

(3) Bagi maksud proviso kepada subseksyen (2), izin hendaklah disifatkan sebagai tidak diberi atau ditahan dengan tidak munasabahnyanya jika pemegang lesen itu tidak sanggup dan mampu membekalkan tenaga yang diperlukan atas terma yang munasabah dan dalam tempoh yang munasabah, setelah menimbangkan, di antara perkara lain, terma dan tempohnya yang Perbadanan sanggup dan mampu membekalkan tenaga itu.

### **Kuasa Perbadanan membekalkan gas dan hidroelektronik**

**18.** (1) Walau apa pun peruntukan seksyen 16 dan 17, fungsi Perbadanan hendaklah termasuk tugas—

- (a) mendapatkan atau memperolehi, membekal dan menjual gas bagi maksud awam dan persendirian mengikut peruntukan mana-mana undang-undang bertulis yang sedang berkuat kuasa berhubungan dengan gas;
- (b) mengusahakan perkembangan sumber kuasa air dalam Negeri, dan menubuhkan stesen jana kuasa yang dikendalikan oleh kuasa hidro untuk penjanaan atau penghantaran elektrik mengikut peruntukan mana-mana undang-undang bertulis yang sedang berkuat kuasa berhubungan dengan kuasa hidro;
- (c) menjalankan semua aktiviti sebagaimana yang didapati oleh Perbadanan sebagai perlu, bermanfaat atau mudah baginya menjalankan untuk atau berkaitan dengan penjalanan kuasanya di bawah salah satu daripada perenggan yang tersebut terdahulu itu.

(2) Bagi maksud subseksyen (1), Perbadanan boleh, dengan kelulusan Menteri, membuat peraturan-peraturan di bawah seksyen 52 untuk mengawal selia bekalan gas dan hidroelektrik yang diperuntukkan oleh Perbadanan mengikut terma dan syarat yang

ditetapkan.

### **Layanan sama rata**

**19.** Perbadanan tidak boleh menunjukkan apa-apa keutamaan tidak wajar antara pengguna dalam kawasan yang sama dan di mana keadaan bekalan termasuk amaun penggunaan, adalah sama, tetapi, kecuali sebagaimana yang disebut di atas tadi, Perbadanan boleh mengenakan caj bagi bekalan tenaga sebagaimana yang dipersetujui tidak melebihi had harga yang ditetapkan oleh Perbadanan, dengan kelulusan Menteri.

### **Bekalan bagi maksud persendirian dan kepada lampu awam**

**20.** (1) Perbadanan hendaklah, apabila dikehendaki berbuat demikian oleh pemunya atau penduduk mana-mana premis yang terletak dalam jarak 100 meter dari mana-mana talian bekalan Perbadanan dalam mana Perbadanan adalah, pada masa itu, dikehendaki menyenggara atau sedang menyenggara, bekalan tenaga bagi maksud bekalan am kepada pengguna persendirian, memberi dan terus memberi bekalan tenaga untuk premis itu, dan Perbadanan hendaklah melengkapkan dan meletakkan apa-apa talian bekalan yang mungkin perlu bagi tujuan pembekalan kuasa maksimum yang mana-mana pemunya atau penduduk itu adalah berhak untuk dibekalkan:

Dengan syarat bahawa kos sebanyak mana pembinaan mana-mana talian bekalan melebihi sepanjang 15 meter bagi bekalan tenaga dari mana-mana bekalan Perbadanan kepada premis mana-mana pemunya atau penduduk hendaklah, jika Perbadanan menghendaki sedemikian, ditanggung oleh pemunya atau penduduk itu.

(2) Tiap-tiap pemunya atau penduduk premis yang berkehendakkan bekalan tenaga hendaklah—

- (a) menyampaikan suatu notis kepada Perbadanan menetapkan premis yang berkenaan dengannya bekalan dikehendaki,

kuasa maksimum yang dikehendaki dibekalkan dan hari, iaitu hari yang tidak terlebih dahulu daripada suatu masa yang munasabah selepas tarikh penyampaian notis, bila bekalan itu dikehendaki dimulakan; dan

- (b) jika dikehendaki oleh Perbadanan, membuat sesuatu kontrak bertulis dengan Perbadanan untuk terus menerima dan membayar bagi bekalan tenaga, selama tempoh sekurang-kurangnya dua tahun, sebanyak amaun yang bayarannya yang dikehendaki dibuat bagi bekalan itu, mengikut kadar caj yang dikenakan pada masa itu oleh Perbadanan bagi bekalan tenaga kepada pengguna biasa dalam kawasan bekalan itu, tidak boleh kurang daripada dua puluh peratus setahun atas perbelanjaan yang ditanggung oleh Perbadanan dalam mengadakan apa-apa talian bekalan yang dikehendaki di bawah seksyen ini supaya diadakan oleh Perbadanan bagi maksud bekalan itu, dan, jika dikehendaki oleh Perbadanan, memberi sekuriti berkenaan dengan pembayaran kepada Perbadanan akan semua wang yang genap masanya dibayar oleh pemunya atau penduduk berkenaan dengan mana-mana talian bekalan yang dikehendaki dilengkapi oleh Perbadanan, dan berkenaan dengan tenaga yang dikehendaki dibekalkan oleh Perbadanan.

(3) Perbadanan hendaklah, apabila menerima notis yang munasabah daripada perbandaran atau pihak berkuasa tempatan menghendaki Perbadanan supaya membekalkan tenaga kepada mana-mana lampu elektrik yang digunakan untuk menerangi mana-mana lebuhraya atau tempat awam dalam kawasan perbandaran atau pihak berkuasa tempatan itu, mengikut mana yang berkenaan, dan disenggara oleh pihak berkuasa itu dalam jarak 100 meter dari mana-mana talian bekalan Perbadanan dalam mana Perbadanan adalah, pada masa itu, dikehendaki menyenggarakan atau sedang menyenggarakan bekalan tenaga bagi maksud bekalan am kepada pengguna persendirian, memberi dan terus memberi bekalan tenaga kepada lampuitu mengikut kuantiti sebanyak yang dikehendaki oleh pihak berkuasa itu supaya dibekalkan.

(4) (a) Perbadanan tidak boleh dipaksa memberi bekalan tenaga kepada mana-mana premis melainkan jika Perbadanan dengan munasabahnyanya berpuas hati bahawa sistem, talian elektrik, pemasangan dan kelengkapan di dalamnya adalah dalam keadaan sedia pakai dan baik, dan tidak akan pada pendapat Perbadanan mendatangkan bahaya kepada keselamatan awam atau keselamatan diri atau menjejaskan dengan mudaratnya penggunaan tenaga oleh Perbadanan atau orang lain.

(b) Perbadanan boleh, setelah memberi bekalan tenaga berkenaan dengan mana-mana premis, melalui notis secara bertulis, menghendaki pemunya atau penduduk premis itu supaya memberi, dalam masa tujuh hari selepas tarikh penyampaian notis itu, sekuriti kepada Perbadanan berkenaan dengan pembayaran semua wang yang genap masanya dibayar kepadanya berkenaan dengan bekalan itu jika pemunya atau penduduk belum lagi memberi sekuriti itu, atau jika mana-mana sekuriti yang diberi telah menjadi tidak sah atau tidak mencukupi, dan, jika mana-mana pemunya atau penduduk itu gagal mematuhi terma notis itu, Perbadanan boleh, jika difikirkannya patut, memberhentikan bekalan tenaga untuk premis itu selagi kegagalan itu berterusan.

### **Syarat di bawah mana bekalan boleh diberhentikan**

#### **21. Jika seorang pengguna atau penduduk premisnya—**

- (a) menggunakan apa-apa bentuk lampu atau kelengkapan pengguna tenaga lain, atau menggunakan tenaga yang dibekalkan kepadanya oleh Perbadanan, dengan sedemikian cara hingga mengganggu dengan tidak wajar atau tidak patut kelicinan bekalan tenaga kepada mana-mana orang lain;
- (b) membuat apa-apa pengubahan pada pemasangannya yang membahayakan keselamatan awam atau keselamatan diri;
- (c) membuat apa-apa pengubahan pada pemasangannya tanpa terlebih dahulu mendapat kelulusan daripada Perbadanan,

yang mengganggu secara tidak wajar atau tidak patut kelicinan bekalan tenaga kepada mana-mana orang lain;

(d) tidak memberi kemudahan munasabah untuk menjalankan ujian atau membaca meter; atau

(e) mengganggu talian bekalan, meter atau lak Perbadanan, maka Perbadanan boleh memberhentikan bekalan tenaga kepada premis itu selagi pengguna atau penduduk melakukan keingkaran berkenaan dengan mana-mana perkara itu.

(2) Perbadanan boleh memberhentikan bekalan tenaga elektrik kepada mana-mana orang yang bayarannya berkenaan dengan bekalan tenaga elektrik adalah pada masa itu bertunggakan (yang tidak menjadi perkara pertikaian *bona fide*), sama ada mana-mana bayaran itu terhutang kepada Perbadanan berkenaan dengan bekalan kepada premis yang berkenaan dengannya bekalan itu dituntut atau berkenaan dengan premis lain.

(3) Jika timbul apa-apa perselisihan tentang sama ada Perbadanan berhak di bawah peruntukan subseksyen (1) untuk memberhentikan bekalan tenaga, maka perselisihan itu hendaklah ditentukan oleh Ketua Pengarah Jemaah Pemeriksa Elektrik.

### **Pemberhentian sementara bekalan tenaga**

**22.** Walau apa pun yang terkandung dalam Akta ini, Perbadanan, setelah memberi, kecuali mengenai hal kecemasan, notis sekurang-kurangnya selama dua puluh empat jam kepada pengguna yang bekalan mereka itu dicadang hendak diberhentikan buat sementara, boleh—

(a) pada bila-bila masa tidak berupaya kerana apa-apa sebab untuk menyenggarakan bekalan tenaga yang berterusan kepada semua pengguna, setakat mana yang kepentingan awam menghendaki dan tanpa keutamaan tidak wajar di antara pengguna, memberhentikan daripada membekalkan



kepada beberapa orang atau kesemua pengguna bagi tempoh yang, bagi kepentingan awam dan kepentingan pengguna, dapat menggunakan tenaga yang ada dengan cara yang baik mungkin; atau

- (b) memberhentikan bekalan tenaga bagi tempoh yang singkat bila-bila masa didapati perlu bagi maksud menjalankan kerja membaiki atau mengadakan sambungan baharu.

#### BAHAGIAN IV

#### PERUNTUKAN KEWANGAN

##### *Kuasa Meminjam dan Menambahkan Modal*

##### **Kuasa mengeluarkan stok, dsb.**

**23.** Perbadanan boleh, dari semasa ke semasa, dengan mengeluarkan stok, dengan kelulusan Menteri, meminjam wang dengan cara mengeluarkan debentur atau stok debentur, atau menambahkan modal dengan cara mengeluarkan syer atau stok dari apa jua jenis dan nilai dan mengikut apa-apa terma sebagaimana yang disifatkan suai manfaat, bagi kesemua atau mana-mana maksud berikut—

- (a) mengadakan modal kerja;
- (b) memenuhi fungsi Perbadanan di bawah Akta ini;
- (c) pengambilan pengusahaan elektrik lain;
- (d) menebus mana-mana syer atau stok yang ia dikehendaki menebus atau ia berhak menebus; dan
- (e) apa-apa perbelanjaan lain yang boleh dipertanggungkan dengan sepatutnya kepada akaun modal.

**Kuasa meminjam wang**

**24.** Perbadanan boleh, dengan kelulusan Menteri, dari semasa ke semasa, meminjam, dengan cara pinjaman, overdraf atau sebaliknya, apa-apa jumlah wang yang dikehendakinya untuk menampung tanggungannya dan menjalankan fungsinya di bawah Akta ini.

*Peruntukan Kewangan Secara Am***Tugas dan kuasa am Perbadanan dalam perkara kewangan**

**25.** Maka adalah menjadi tugas Perbadanan menjalankan dan melaksanakan sedemikian fungsinya di bawah Akta ini bagi menjamin yang jumlah hasil Perbadanan adalah mencukupi untuk membiayai jumlah belanja yang dipertanggungkan dengan sepatutnya kepada akaun hasil, termasuk susut nilai, dan bunga atas modal, dengan membandingkan setahun dengan setahun yang lain.

**Kadar dan skala caj bagi tenaga**

**26.** (1) Harga yang dikenakan oleh Perbadanan bagi bekalan tenaga dan sewaan kelengkapan hendaklah mengikut apa-apa tarif yang boleh, dari semasa ke semasa, ditetapkan melalui peraturan-peraturan yang dibuat di bawah seksyen 52:

Dengan syarat bahawa tiada apa-apa jua dalam seksyen ini atau dalam mana-mana peraturan itu boleh menahan Perbadanan dari mengenakan harga lain melalui perjanjian khas.

(2) Pada menetapkan tarif dan membuat perjanjian bagi pembekalan tenaga Perbadanan tidak boleh menunjukkan keutamaan tidak wajar di antara pengguna yang tinggal setempat dan tidak boleh mengamalkan diskriminasi tidak wajar di antara orang yang tinggal setempat, dengan memberi perhatian kepada tempat dan waktu pembekalan, kuantiti tenaga yang dibekalkan, faktor beban dan kuasa pengguna, dan maksudnya bekalan itu diambil.

(3) Tarif yang genap masanya dan kena dibayar dibawah seksyen ini boleh didapatkan kembali melalui prosiding sivil sebagai hutang yang kena dibayar kepada Perbadanan:

Dengan syarat bahawa tiada tuntutan berkenaan dengan pembayaran tarif di bawah seksyen ini bila menjadi sah kecuali ianya dibuat dalam masa enam tahun dari tarikh bila tarif itu genap masanya dan kena dibayar.

### **Kuasa untuk membuat perintah tetap berhubungan dengan kakitangan**

**27.** (1) Perbadanan boleh, dengan kelulusan Menteri, melalui perintah tetap membuat peruntukan mengenai perintah syarat perkhidmatan bagi pegawai dan pekhidmat Perbadanan.

(2) Khususnya, tetapi tanpa menyentuh keluasan subseksyen (1), perintah tetap itu boleh membuat peruntukan mengenai—

- (a) pelantikan, pembuangan kerja, disiplin, cuti, dan jaminan yang hendak diberi oleh mana-mana pegawai atau pekhidmat itu;
- (b) gaji, fi, saraan, elaun, pencen, elaun persaraan dan apa-apa ganjaran yang kena dibayar di bawah sesuatu kontrak, bagi mana-mana pegawai atau pekhidmat itu; dan
- (c) apa-apa rayuan oleh mana-mana pegawai atau pekhidmat itu terhadap pembuangan kerjanya atau terhadap apa-apa langkah tatatertib lain yang diambil terhadapnya.

### **Penggunaan hasil**

**28.** (1) Hasil Perbadanan bagi mana-mana tahun kewangan hendaklah digunakan bagi membayar caj berikut—

- (a) gaji, fi, saraan, elaun, pencen, elaun persaraan dan apa-apa

ganjaran yang kena dibayar di bawah sesuatu kontrak bagi pegawai, ejen dan pekhidmat, dan penasihat teknik atau penasihat lain, Perbadanan;

- (b) bunga atas mana-mana debentur dan stok debentur yang dikeluarkan, dan atas apa-apa pinjaman yang didapati oleh Perbadanan;
- (c) jumlah wang yang dikehendaki dipindahkan kepada kumpulan wang penjelas atau sebaliknya diketepikan bagi maksud membuat peruntukan bagi menebus debentur atau stok debentur atau membayar balik wang lain yang dipinjam;
- (d) belanja mengerjakan dan menubuhkan serta perbelanjaan menyenggarakan, atau peruntukan bagi menyenggarakan, mana-mana pemasangan Perbadanan dan menjalankan pelaksanaan fungsi Perbadanan yang dipertanggungjawabkan dengan sepatutnya kepada akaun hasil;
- (e) apa-apa jumlah wang yang disifatkan oleh Perbadanan sebagai patut diketepikan berkenaan dengan kesusutan nilai harta Perbadanan setelah memberi perhatian kepada amaun yang diketepikan daripada hasil di bawah perenggan (c);
- (f) saraan, fi dan elaun anggota Perbadanan; dan
- (g) apa-apa perbelanjaan lain yang dibenarkan oleh Perbadanan dan dipertanggungjawabkan dengan sepatutnya kepada akaun hasil.

(2) Baki hasil Perbadanan hendaklah digunakan—

- (a) bagi mewujudkan rizab; dan
- (b) bagi membayar apa-apa bunga atas syer dan stok yang dikeluarkan oleh Perbadanan sebagaimana yang pada pendapat Perbadanan keadaan pengusahaan dan kedudukan kewangan Perbadanan membenarkan, tetapi agar supaya,

dalam hal syer atau stok biasa, kadar bunga itu tidak boleh melebihi kadar purata sebanyak enam peratus setahun daripada nilai nominalnya dengan membandingkan setahun dengan setahun yang lain.

### **Pelaburan wang**

**29.** Mana-mana wang Perbadanan yang tidak diperlukan serta-merta untuk dibelanjakan bagi membiayai apa-apa kewajipan atau menjalankan apa-apa fungsi Perbadanan, boleh dilaburkan dari semasa ke semasa dalam sekuriti yang dibenarkan bagi pelaburan wang amanah oleh mana-mana undang-undang bertulis yang sedang berkuat kuasa.

### **Akta Badan Berkanun (Akaun dan Laporan Tahunan) 1980 terpakai**

**30.** Bagi mengelakkan keraguan, maka adalah ditetapkan bahawa peruntukan Akta Badan Berkanun (Akaun dan Laporan Tahunan) 1980 [*Akta 240*] adalah terpakai berkenaan dengan Perbadanan.

**31.** (*Dipotong*)

## **BAHAGIAN V**

### **KUASA MEMASUKI TANAH, DLL.**

#### *Kuasa Memasuki Tanah*

### **Kuasa memasuki tanah bagi maksud menjalankan pembinaan**

**32.** (1) Tertakluk sebagairnana yang diperuntukkan selepas ini, bila-bila masa sahaja perlu berbuat demikian bagi maksud pemasangan apa-apa sistem pengagihan tenaga di bawah Akta ini, Perbadanan

boleh meletakkan, menempatkan atau membawa atas, di bawah atau di atas mana-mana tanah, selain tanah Kerajaan apa-apa talian bekalan, dan boleh mendirikan di dalam atau di atas mana-mana tanah, selain tanah Kerajaan, apa-apa tiang dan kelengkapan lain sebagaimana yang perlu atau patut bagi maksud pemasangan kepunyaan Perbadanan, dan boleh mengambil apa-apa tindakan lain sebagaimana yang perlu untuk menjadikan pemasangan itu selamat dan berjalan lancar, membayar pampasan sepenuhnya kepada semua orang yang berkepentingan atas apa-apa gangguan, kerosakan atau ketidakupayaan yang mungkin disebabkan dengannya itu dan pampasan itu boleh termasuk satu bayaran tahunan untuk tanah yang digunakan bagi maksud mendirikan tiang atau kelengkapan lain itu.

(2) Sebelum memasuki mana-mana tanah bagi maksud yang dinyatakan dalam subseksyen (1), Perbadanan hendaklah memberi notis kepada pemunya atau penduduk tanah itu, menyatakan dengan sepełuh dan setepat yang boleh, jenis dan setakat mana tindakan yang dicadangkan hendak dilakukan dan memberitahu pemunya atau penduduk akan haknya, di bawah peruntukan subseksyen (4), untuk membantah cadangan tindakan yang dimaksudkan itu.

(3) Notis itu hendaklah disifatkan telah diberi dengan sempurna jika dihantar melalui pos berdaftar atau ditinggalkan di tempat tinggal biasa atau akhir diketahui yang kepadanya notis itu hendak diberikan atau, jika tempat tinggal biasa atau akhir diketahui tidak boleh ditentukan, dengan menampalkan notis itu pada suatu bahagian tanah itu yang mudah kelihatan.

(4) Pemunya atau penduduk boleh, dalam masa empat belas hari penerimaan notis itu, membuat suatu bantahan terhadap tindakan yang dicadangkan oleh Perbadanan. Bantahan itu hendaklah dibuat kepada Pengarah Tanah dan Ukur, sama ada secara lisan atau secara bertulis, dan Pengarah Tanah dan Ukur hendaklah memberi notis tentang bantahan itu kepada Perbadanan.

(5) Jika tiada bantahan dibuat dalam masa yang dihadkan bagi maksud itu oleh subseksyen (4), maka Perbadanan boleh dengan serta-merta memasuki tanah itu dan melakukan segala atau mana-mana tindakan yang dinyatakan dalam notis itu.

(6) Jika suatu bantahan dibuat dan tidak ditarik balik sebelum tarikh yang ditetapkan untuk pendengarannya itu, maka Pengarah Tanah dan Ukur hendaklah mengadakan suatu siasatan, dengan memberi kesemua pihak peluang untuk didengar.

(7) Setelah tamat siasatan itu atau setelah menerima syor tersebut, Pengarah Tanah dan Ukur boleh, sama ada tanpa syarat atau tertakluk kepada apa-apa terma, syarat dan ketetapan yang difikirkannya patut, membenarkan atau melarang mana-mana tindakan yang disebut dalam notis itu.

### **Penyenggaraan dan pembaikan pemasangan**

**33.** Bila-bila masa 'sahaja perlu berbuat demikian bagi maksud menyenggara atau memperbaiki pemasangan kepunyaan Perbadanan atau mana-mana bahagian daripadanya, Perbadanan atau mana-mana orang yang diberi kuasa oleh Perbadanan bagi maksud itu boleh, pada setiap masa yang munasabah, memasuki mana-mana tanah atas, di bawah atau di atasnya talian bekalan itu telah diletakkan, ditempatkan atau dibawa, atau di atasnya tiang atau kelengkapan lain telah didirikan, dan boleh menjalankan segala kerja pembaikan yang perlu, dan boleh, pada masa menjalankannya itu, menebang atau mencantas pokok, membuang tumbuh-tumbuhan dan melakukan segala perkara lain yang perlu bagi maksud tersebut, dengan menyebabkan sedikit mungkin kerosakan dan membayar pampasan penuh kepada semua orang yang berkepentingan atas apa-apa kerosakan yang mungkin disebabkan dengannya itu yang mana pampasan baginya belum lagi dibayar atau dipersetujui dibayar di bawah seksyen 32.

### **Pengalihan atau pengubahan talian bekalan, dll.**

**34.** (1) Jika talian bekalan telah diletakkan, atau tiang atau kelengkapan didirikan, atas mana-mana tanah dibawah peruntukan seksyen 32 atau 33 dan pemunya atau penduduk tanah itu berhasrat hendak menggunakan tanah itu dengan sedemikian cara hingga menyebabkannya perlu atau bermanfaat yang talian, tiang atau kelengkapan itu patut dialihkan ke suatu bahagian lain dalam tanah

itu, atau ke suatu aras yang lebih tinggi atau yang lebih rendah, atau diubah bentuknya, dia mungkin menghendaki Perbadanan mengalih atau mengubah talian, tiang atau kelengkapan itu sewajarnya.

(2) Jika Perbadanan tidak mematuhi rekuisisi itu maka orang itu boleh memohon secara bertulis kepada Pengarah Tanah dan Ukur yang boleh, selepas menyiasat semua fakta mengenai kes itu, menolak permohonan itu atau membuat suatu perintah, sama ada secara mutlak atau tertakluk kepada syarat, berkenaan dengan pengalihan atau pengubahan talian, tiang atau kelengkapan itu dan perintah itu hendaklah membuat peruntukan mengenai pembayaran kos melaksanakan pengalihan atau pengubahan itu oleh Perbadanan atau oleh orang yang membuat permohonan itu sebagaimana difikirkan saksama oleh Pengarah Tanah dan Ukur mengikut keadaan kes itu.

(3) Apabila talian bekalan telah diletakkan, atau tiang atau kelengkapan didirikan, di atas Tanah Kerajaan, dan tanah itu kemudiannya diberi hakmilik kepada mana-mana orang, maka pemunya atau penduduk tanah itu boleh, melainkan jika terma pemberian hakmilik itu memperuntukkan dengan nyata selainnya, menghendaki dialihkan ke suatu bahagian lain dalam tanah itu, atau satu aras lebih tinggi atau yang lebih rendah, atau diubahkan talian, tiang atau kelengkapan itu dan peruntukan subseksyen (1) dan (2) adalah terpakai bagi apa-apa jua rekuisisi itu:

Dengan syarat bahawa kos melaksanakan pengalihan atau pengubahan itu hendaklah ditanggung oleh orang yang membuat rekuisisi itu.

### **Rayuan kepada Menteri**

**35.** Mana-mana orang yang terkilan dengan keputusan Pengarah Tanah dan Ukur di bawah seksyen 32 atau 34 boleh merayu kepada Menteri yang keputusannya adalah muktamad.



**Kuasa untuk memasang tiang lampu, dsb.**

**36.** Perbadanan atau mana-mana orang yang diberi kuasa oleh Perbadanan bagi maksud itu boleh, tertakluk kepada undang-undang kecil yang berkuat kuasa di dalam mana-mana kawasan perbandaran atau pihak berkuasa tempatan, menyebabkan besi lampu, tiang lampu, bahan penebat, braket, umbang, rozet atau kelengkapan lain untuk didirikan atau dipasang pada atau bersandarkan dinding atau pagar kubu mana-mana rumah, bangunan atau kepungan yang disifatkan patut, dengan melakukan sedikit kerosakan yang mungkin praktik dan membuat pindaan yang mencukupi dengan cara pembaikan, restorasi atau pampasan kepada semua orang yang berkepentingan kerana kerosakan yang dilakukan itu, dan boleh menyebabkan beberapa lampu daripada berbagai saiz dan jenis diletak dan dilekatkan pada mana-mana besi lampu, tiang lampu dan braket yang disifatkan perlu dan boleh menyebabkan yang demikian itu diterangi pada waktu yang disifatkan perlu oleh perbandaran atau pihak berkuasa tempatan.

*Kerja-kerja***Kuasa untuk memecahkan lebuh, dll., di bawah pengawasan, dan untuk membuka parit**

**37.** (1) Perbadanan, di bawah apa-apa pengawasan sebagaimana yang dinyatakan kemudian dari ini, boleh—

- (a) membuka dan memecahkan tanah dan lapik batu beberapa lebuh dan jambatan dalam kawasan bekalan Perbadanan;
- (b) membuka dan memecahkan mana-mana betung, parit atau terowong di dalam atau di bawah lebuh dan jambatan itu dan meletakkan serta menempatkan, dalam had kawasan yang sama, talian bekalan dan kerja lain dari, dari semasa ke semasa membaiki, mengubah atau mengalihkannya;
- (c) bagi maksud yang disebut terdahulu, mengalih dan menggunakan semua tanah dan bahan di dalam dan di bawah lebuh dan jambatan itu; dan

- (d) di lebuh itu, mendirikan apa-apa tiang, tonggak, lampu dan kerja lain dan melakukan segala tindakan lain yang disifatkan perlu oleh Perbadanan dari semasa ke semasa bagi membekalkan elektrik kepada penduduk dalam kawasan bekalan Perbadanan,

dengan melakukan sedikit mungkin kerosakan dalam melaksanakan kuasa yang dengan ini diberi, dan memberi pampasan kerana apa-apa kerosakan yang mungkin dilakukan dalam melaksanakan kuasa itu, dan tertakluk kepada apa-apa kaedah-kaedah sebagaimana yang boleh dibuat di bawah Akta ini.

(2) Jika Perbadanan bercadang hendak mendirikan atau telah mendirikan dalam mana-mana lebuh, apa-apa tiang, tonggak, lampu atau kerja lain, atau bercadang hendak meletak atau telah meletakkan suatu talian bekalan di sepanjang mana-mana lebuh, maka Ketua Pengarah Jemaah Pemeriksa Elektrik atau, berkenaan dengan mana-mana lebuh dalam kawasan perbandaran atau pihak berkuasa tempatan, perbandaran atau pihak berkuasa tempatan itu, mengikut mana yang berkenaan, boleh, walau apa pun peruntukan lain dalam Akta ini, dengan notis secara bertulis menghendaki Perbadanan supaya mengubah kedudukan tiang, tonggak, lampu, kerja-kerja atau talian bekalan lain itu, tertakluk kepada syarat yang, jika tiada perjanjian di antara pihak itu, boleh ditentukan oleh Menteri.

### **Syarat tentang pengawasan pemecahan lebuh**

**38.** Tiada apa-apa lebuh, jambatan, betung, parit atau terowong itu boleh, kecuali dalam masa kecemasan, dibuka atau dipecahkan, kecuali di bawah pengawasan orang yang mempunyai kawalan atau pengurusan ke atasnya atau pegawai mereka, dan mengikut apa-apa pelan yang diluluskan oleh orang itu atau pegawai mereka atau, jika berlaku apa-apa perselisihan berkenaan dengan pelan itu, mengikut pelan yang ditentukan oleh Menteri yang boleh, atas permohonan orang yang mempunyai kawalan atau pengurusan itu, atau pegawai mereka, menghendaki Perbadanan supaya membuat apa-apa kerja sementara atau kerja lain sebagaimana difikirkannya perlu oleh pemohon untuk mengawal terhadap apa-apa gangguan ke atas

perparitan semasa melaksanakan apa-apa kerja yang menghalang betung atau parit:

Dengan syarat bahawa, jika orang yang mempunyai kawalan atau pengurusan tidak hadir pada masa yang ditetapkan bagi pembukaan mana-mana lebu, jambatan, betung, parit atau terowong itu, selepas mendapat notis mengenai niat Perbadanan, atau tidak mencadangkan apa-apa pelan untuk memecah atau membukanya, atau enggan atau cuai mengawasi kendalian itu, Perbadanan boleh melaksanakan kerja yang dinyatakan dalam notis itu tanpa pengawasan orang-orang itu atau pegawai mereka.

**Lebu, dll., yang dipecahkan hendaklah dibaiki semula tanpa kelengahan**

**39.** Apabila Perbadanan membuka atau memecahkan jalan atau lapik batu mana-mana lebu atau jambatan, atau mana-mana betung, parit atau terowong, Perbadanan hendaklah, dengan segala kepantasan yang sesuai menyiapkan kerja yang dipecahkan itu dan menimbusnya dan memulihkan dan memperbaiki jalan atau lapik batu itu, atau betung, parit atau terowong yang dibuka atau dipecahkan sedemikian, dan membuang sampah yang disebabkan oleh kerja itu, dan hendaklah pada setiap masa, semasa mana-mana jalan atau lapik batu itu dibuka atau dipecahkan sedemikian itu, menyebabkannya dipagar dan dikawal dan hendaklah menyebabkan diadakan dan disenggara alat yang mengeluarkan cahaya yang cukup untuk memberi amaran kepada orang ramai pada atau berhampiran dengan jalan atau lapik batu itu di mana ianya hendak dibuka atau dipecahkan pada tiap-tiap malam, sebelum matahari turun dan sehingga matahari terbit, dalam masa mana ianya hendaklah terus dibuka atau dipecahkan dan hendaklah menjaga jalan atau lapik batu yang telah dipecahkan itu supaya berada dalam keadaan baik untuk selama tiga bulan selepas mengganti dan memperbaikinya, dan untuk masa yang lebih lanjut, jika dikehendaki, tidak lebih enam bulan pada keseluruhannya, oleh kerana tanah yang dipecahkan sedemikian terus mendap.

**Notis hendaklah disampaikan kepada orang yang mempunyai kawalan, dll., sebelum memecahkan lebuhr atau membuka parit**

**40.** Sebelum Perbadanan meneruskan untuk membuka atau memecahkan mana-mana lebuhr, jambatan, betung, parit atau terowong, Perbadanan hendaklah memberi kepada orang yang di bawah kawalan atau pengurusannya yang demikian itu berada, atau kepada pegawai mereka, notis secara bertulis mengenai niatnya, tidak kurang daripada tujuh hari genap sebelum permulaan kerja itu, kecuali dalam hal kecemasan yang berbangkit daripada kecacatan pada mana-mana talian bekalan atau kerja-kerja lain, dan kemudiannya secepat yang mungkin selepas permulaan kerja itu, atau selepas keperluan mengadakannya berbangkit.

### **Pampasan**

**41.** Amaun pampasan yang kena dibayar di bawah peruntukan Akta ini boleh, jika memungkirkan perjanjian, dituntut dan ditentukan dengan tindakan sivil dalam mahkamah yang mempunyai bidang kuasa yang sesuai.

## **BAHAGIAN VI**

### **KESALAHAN-KESALAHAN**

#### **Kesalahan-kesalahan**

**42.** (1) Mana-mana orang yang dengan sengaja mengusik atau mengubah mana-mana pemasangan kepunyaan Perbadanan atau sebahagian daripadanya hingga menyebabkan atau mungkin menyebabkan bahaya kepada nyawa manusia atau anggota badan atau bencana kepada mana-mana kelengkapan atau harta lain melakukan suatu kesalahan dan, apabila disabitkan, boleh dipenjarakan selama tempoh lima tahun dengan atau tanpa denda.

(2) Mana-mana orang yang, dengan apa jua tindakan atau peninggalan yang gopoh atau cuai berkenaan dengan mana-mana pemasangan kepunyaan Perbadanan menyebabkan cedera kepada mana-mana orang atau bencana kepada harta melakukan suatu kesalahan dan, apabila disabitkan, boleh dipenjarakan selama tempoh dua tahun dan didenda lima ribu ringgit.

(3) Mana-mana orang yang dengan curang menarik, mengguna habis atau mengguna apa-apa tenaga, atau dengan curang mengubah indeks mana-mana meter atau instrumen lain yang digunakan pada atau berkaitan dengan mana-mana pemasangan kepunyaan Perbadanan untuk merekodkan pengeluaran atau penggunaan habis tenaga, atau dengan curang menghalang mana-mana meter atau instrumen itu daripada merekodkan dengan wajar pengeluaran atau penggunaan habis tenaga, melakukan suatu kesalahan dan, apabila disabitkan, boleh dipenjarakan selama tempoh dua tahun dan didenda lima ribu ringgit.

### **Beban pembuktian**

**43.** Dalam apa-apa pendakwaan bagi suatu kesalahan di bawah subseksyen 42(3) —

- (a) bukti pemasangan apa-apa sawat atau alat lain, atau pengalihan mana-mana bahagian atau sambungan penting, pada, dari atau bagi mana-mana kelengkapan yang boleh memudahkan penarikan, penggunaan habis atau penggunaan tenaga dengan curang hendaklah, terhadap orang yang memasang atau mengalihkannya, atau menyebabkannya dipasang atau dialih, atau mempunyai kawalan ke atas kelengkapan itu, menjadi keterangan *prima facie* tentang penarikan, penggunaan habis atau penggunaan dengan curang; dan
- (b) kewujudan alat-alat tiruan bagi mengubah indeks mana-mana meter, atau kewujudan alat tiruan bagi mengalihkan mana-mana bahagian dari mana-mana kelengkapan bagi maksud menghalang mana-mana meter atau instrumen

daripada mendaftar dengan wajar kuantiti tenaga yang dibekalkan atau bagi maksud penarikan, penggunaan habis atau penggunaan tenaga dengan curang, hendaklah, sehingga dibuktikan sebaliknya, menjadi keterangan bahawa perubahan, penghalangan, penarikan, penggunaan habis atau penggunaan itu, mengikut mana yang berkenaan, telah disebabkan dengan cara fraud, dengan diketahui dan dengan sengaja oleh pengguna yang menggunakan meter atau instrumen itu dan orang yang mempunyai kawalan ke atas pemasangan di mana ianya dipasangkan, atau bahawa pengguna atau orang itu telah bersubahat melakukan kesalahan mengubah, menghalang, menarik, mengguna habis atau mengguna itu, mengikut mana yang berkenaan.

#### **Kesalahan yang dilakukan oleh pertubuhan perbadanan**

**44.** Jika sesuatu kesalahan di bawah Akta ini telah dilakukan oleh suatu pertubuhan perbadanan dibuktikan—

- (a) telah dilakukan mengikut cara yang diperuntukkan dalam seksyen 43; atau
- (b) telah dilakukan dengan persetujuan atau dibiarkan, atau telah diikatkan dengan apa-apa kecuaiian,

oleh atau di pihak mana-mana pengarah, setiausaha atau pegawai yang seumpamanya pertubuhan perbadanan itu, atau mana-mana orang yang berupa bertindak atas sifat sedemikian itu maka dia dan juga pertubuhan perbadanan hendaklah disifatkan sebagai melakukan kesalahan itu dan boleh kena dikenakan tindakan dan dihukum dengan sewajarnya.

#### **Mendapatkan balik penalti, dsb.**

**45.** Apa-apa penalti, fi, perbelanjaan atau wang-wang lain yang boleh didapati balik di bawah Akta ini atau kontrak, yang untuk mendapatkannya balik tidak ada diperuntukkan selainnya dengan

khas, hendaklah menjadi hutang sivil yang boleh didapati balik secara terus.

## BAHAGIAN VII

### PEMINDAHAN PENGUSAHAAN, DSB., PERTUBUHAN PERBADANAN KEPADA PERBADANAN

*Harta, Kontrak, dsb.*

#### **Pampasan bagi pengusahaan yang dipindahkan**

**46. (1) Jika—**

- (a) apa-apa pengusahaan, pemasangan atau harta lain, yang menjadi pengusahaan, pemasangan, atau harta lain kepunyaan pertubuhan perbadanan yang ditubuhkan dibawah Ordinan Perbadanan Pembekalan Letrik Sarawak 1962 [*Ord. 25/62*] yang dimansuhkan itu (kemudian daripada ini disebut “pertubuhan perbadanan” dalam Bahagian ini) dipindahkan kepada Perbadanan; dan
- (b) apa-apa stok yang dikeluarkan kepada Setiausaha Kewangan Negeri yang diperbadankan oleh Ordinan Setiausaha Kewangan Negeri (Perbadanan) [*Sarawak Bab 103*], untuk dipegang bagi maksud Kerajaan Negeri Sarawak, dipindahkan kepada Menteri Kewangan, yang diperbadankan oleh Ordinan Menteri Kewangan (Perbadanan) 1957 [*Akta 375*], untuk dipegang bagi maksud Kerajaan Persekutuan,

Kerajaan Persekutuan hendaklah, dengan seberapa segera yang praktik, membayar berkenaan dengannya itu, apa-apa pampasan kepada Kerajaan Negeri Sarawak, sebagaimana dipersetujui oleh, dan antara Kerajaan Persekutuan dan Kerajaan Negeri Sarawak.

- (2) Bagi maksud subseksyen (1), apa-apa pengusahaan,

pepasangan atau harta lain hendaklah bererti, termasuk, segala loji, tanah, kerja dan harta lain, harta alih atau harta tak alih, aset, kuasa, hak dan keistimewaan yang dipegang atau dinikmati berkaitan dengan atau berkenaan dengannya.

### **Kontrak, dsb., yang sedia ada**

**47.** Segala surat ikatan, bon, perjanjian, surat cara dan perkiraan kerja, yang sedia ada sebelum sahaja mula berkuatkuasanya Akta ini yang menyentuh mana-mana pengusahaan, pemasangan atau harta lain kepunyaan pertubuhan perbadanan yang dipindahkan itu, hendaklah sama berkuat kuasa dan berkesan seperti terhadap atau untuk Perbadanan dan boleh dikuatkuasakan dengan sepenuh dan berkesannya seolah-olah, Perbadanan telah dinamakan dalamnya atau telah menjadi satu pihak kepadanya menggantikan pertubuhan perbadanan itu.

### **Prosiding belum selesai**

**48.** Apa-apa prosiding atau kausa tindakan, yang belum selesai atau sedia ada sebelum sahaja mula berkuatkuasanya Akta ini, oleh atau terhadap pertubuhan perbadanan, atau apa-apa hutang yang terutang kepada atau oleh pertubuhan perbadanan, boleh diteruskan atau dikuatkuasakan, oleh atau terhadap Perbadanan, seolah-olah pertubuhan perbadanan itu telah tidak diperbadankan.

### *Pegawai atau Pekhidmat*

### **Pertukaran pegawai atau pekhidmat dalam perjawatan pertubuhan perbadanan**

**49.** (1) Tiap-tiap pegawai atau pekhidmat, yang sebelum sahaja mula berkuatkuasanya Akta ini, telah diambil kerja sebagai pegawai atau pekhidmat pertubuhan perbadanan hendaklah, apabila mula berkuatkuasanya Akta ini, disifatkan ditukarkan daripada



perkhidmatan pertubuhan perbadanan kepada perkhidmatan Perbadanan, mengikut terma dan syarat perkhidmatan, perkuisit dan emolumen tidak kurang baiknya daripada yang dinikmatinya sebelum sahaja mula berkuatkuasanya Akta ini.

(2) Tiada apa-apa jua dalam seksyen ini boleh disifatkan sebagai menjejaskan hak Perbadanan untuk menamatkan pekerjaan mana-mana pegawai atau pekhidmat yang ditukarkan ke perkhidmatan Perbadanan, atau untuk mengubah kadar gaji atau syarat perkhidmatannya, mengikut cara dan setakat mana yang pertubuhan perbadanan dapat lakukan sekiranya dia terus berkhidmat dengan pertubuhan perbadanan itu.

## BAHAGIAN VIII

### AM

#### **Kuasa Menteri untuk mewakilkan kuasa**

**50.** Menteri boleh mewakilkan kesemua atau mana-mana kuasa yang diberikan kepadanya oleh Akta ini atau mana-mana peraturan yang dibuat di bawahnya kepada mana-mana orang, tertakluk kepada apa-apa syarat dan batasan, jika ada, yang difikirkannya patut dikenakan, dan boleh membatalkan perwakilan itu.

#### **Kuasa Menteri memberi arahan**

**51.** (1) Menteri boleh memberi kepada Perbadanan arahan bersifat am, yang tidak berlawanan dengan peruntukan Akta ini, mengenai perjalanan dan pelaksanaan oleh Perbadanan akan fungsinya, dan Perbadanan hendaklah melaksanakan mana-mana arahan yang diberi sedemikian itu.

(2) Perbadanan hendaklah memberi kepada Menteri apa-apa maklumat berkenaan dengan harta dan aktivitinya sebagaimana dikehendaki oleh Menteri dari semasa ke semasa.

**Peraturan-peraturan**

**52.** (1) Perbadanan boleh, dengan kelulusan Menteri, membuat peraturan-peraturan yang pada amnya berkenaan dengan pelaksanaan dengan lebih baik akan peruntukan Akta ini.

(2) Peraturan-peraturan yang dibuat di bawah seksyen ini boleh, tanpa menyentuh keluasan kuasa yang diberikan oleh subseksyen (1), mengadakan peruntukan—

- (a) bagi kadar dan harga yang hendak dikenakan bagi bekalan tenaga kepada pengguna;
- (b) bagi caj yang dikenakan untuk sewaan kelengkapan kepada pengguna;
- (c) bagi perkara berkenaan dengan syer, stok, debentur atau stok debentur yang dikeluarkan di bawah Akta ini, dan, khususnya, cara mengeluarkan, memindah milik, menebus, atau urusan lain mengenai syer, stok, debentur atau stok debentur itu,
- (d) bagi pengawalseliaan bekalan gas dan hidroelektrik;
- (e) bagi penetapan saraan dan elaun bagi anggota Perbadanan;
- (f) bagi perkara berhubungan dengan meter; dan
- (g) bagi penetapan apa-apa jua yang dikehendaki ditetapkan atau boleh ditetapkan di bawah Akta ini.

**Kuasa untuk membuat kontrak gerenti atau tanggung rugi**

**53.** Perbadanan boleh, dengan kelulusan Menteri, membuat kontrak gerenti atau tanggung rugi bagi maksud memudahkan pengambilan balik atau pembinaan rumah kediaman oleh pegawai atau pekhidmat lain Perbadanan.

**Hak kekecualian Kerajaan Sarawak di pantai pasang surut**

**54.** Walaupun sesuatu pantai, dasar tasik, sungai, tali air, caruk, teluk atau muara adalah termasuk dalam kawasan bekalan, tiada apa-apa jua boleh membenarkan Perbadanan mengambil, menggunakan atau dengan apa jua cara mengganggu mana-mana bahagian pantai, dasar tasik atau sungai, tali air, caruk, teluk atau muara itu, atau apa-apa hak berkenaan dengannya, atau airnya, tanpa terlebih dahulu mendapat keizinan secara bertulis daripada Pihak Berkuasa Negeri dan tiada apa-apa jua yang terkandung dalam Akta ini boleh sampai menghapuskan, memudaratkan, menyusut atau mengubah mana-mana estet, hak, keistimewaan, kuasa atau autoriti yang ~~terletak hak~~ terletak hak pada atau dinikmati atau dijalankan oleh Kerajaan Negeri Sarawak.

---

**UNDANG-UNDANG MALAYSIA****Akta 279****AKTA PERBADANAN PEMBEKALAN LETRIK  
SARAWAK 1983****SENARAI PINDAAN**

Undang-undang yang meminda	Tajuk ringkas	Berkuat kuasa dari
Akta478	Akta Pembatalan Pengecualian daripada Bayaran Duti-duti Setem 1992	21-02-1992

---

**UNDANG-UNDANG MALAYSIA****Akta 279****AKTA PERBADANAN PEMBEKALAN LETRIK  
SARAWAK 1983****SENARAI SEKSYEN YANG DIPINDA**

Seksyen	Kuasa meminda	Berkuat kuasa Dari
31	Akta 478	21-02-1992

---